



## UPM Buka Lembaran Baharu Dalam Penyelidikan Pertahanan Negara



*Timbalan Naib Canselor UPM (Penyelidikan dan Inovasi), Prof. Dr. Abu Bakar Salleh menyerahkan cenderamata kepada Menteri Pertahanan, Dato' Seri Dr. Ahmad Zahid Hamidi.*

**KUALA LUMPUR, 6 Oktober** - Institusi Pengajian Tinggi Malaysia diseru agar bekerjasama dengan universiti luar negara untuk berkongsi ilmu bagi membina industri pertahanan di rantau ini.

Menteri Pertahanan, Dato' Seri Dr. Ahmad Zahid Hamidi berkata kerjasama universiti bersama industri adalah penting dalam membangunkan industri pertahanan di Malaysia.

"Kini sudah tiba masanya Malaysia untuk terlibat serta menjadi pengeluar industri pertahanan. Di negara Eropah Timur, industri pertahanan adalah salah satu sumber ekonomi yang menjana pendapatan negara."

Menurut beliau lagi, dengan adanya penyelidikan ini juga akan memantapkan lagi aktiviti penyelidikan terutama di kalangan tenaga pengajar di universiti.

"Ini adalah signifikan kerana IPT akan dapat mengetahui serta memenuhi permintaan dan perubahan industri. Pihak industri juga dapat memberikan input kepada perubahan dan keperluan semasa masa kini," katanya lagi.

Terdahulu Naib Canselor UPM, Prof. Datuk Dr. Nik Mustapha R. Abdullah dalam ucapannya, yang diwakili oleh Timbalan Naib Canselor UPM (Penyelidikan dan Inovasi), Prof. Dr. Abu Bakar Salleh, berkata persidangan ini mengetengahkan pakar dari bidang akademik, industri serta badan kerajaan yang menyediakan pemahaman dan kesedaran mengenai isu masa kini serta informasi masa hadapan berkaitan dengan aktiviti dan projek dalam sains pertahanan dan pembangunan keselamatan.

"Ini akan meningkatkan kerjasama dan jaringan di kalangan institusi pengajian tinggi, industri, pemegang taruh dan agensi kerajaan dalam membangunkan teknologi pertahanan terkini dan inovasi keselamatan," katanya.

Berlandaskan kepada misi untuk menjadi pusat pembelajaran dan penyelidikan yang unggul, UPM sentiasa menjana idea baru bagi merealisasikan peranan sebagai pencetus inovasi dan teknologi serta melahirkan pemikir yang kreatif dan inovatif.



*Menteri Pertahanan, Dato' Seri Dr. Ahmad Zahid Hamidi memberikan taklimat dalam Persidangan Asia Pacific Conference On Defence And Security Technology 2009.*

Persidangan Asia Pacific Conference On Defence And Security Technology 2009 ini buat julung kalinya dianjurkan oleh Universiti Putra Malaysia (UPM) bersama dengan Universiti Teknologi Malaysia (UTM), International Islamic University Malaysia (IIUM) dan Universiti Pertahanan Nasional Malaysia (UPNM) dengan kerjasama Angkatan Tentera Malaysia.

Turut hadir, Jeneral Tan Sri Azizan Ariffin selaku Panglima Angkatan Tentera Malaysia dan Naib Canselor Universiti Pertahanan Nasional Malaysia, Lt. Jen. Dato' Pahlawan Hj Zulkifli Hj Zainal Abidin.